



中国经典名著

全唐诗

(三)

黄怀仁 齐思明 校正

学苑音像出版社

目 录

第三十二卷.....	1
第三十三卷.....	11
第三十四卷.....	20
第三十五卷.....	27
第三十六卷.....	39
第三十七卷.....	50
第三十八卷.....	67
第三十九卷.....	75
第四十卷.....	92
第四十一卷.....	99
第四十二卷.....	117
第四十三卷.....	134
第四十四卷.....	143
第四十五卷.....	154
第四十六卷.....	158
第四十七卷.....	168
第四十八卷.....	192
第四十九卷.....	214
第五十卷.....	238
第五十一卷.....	250
第五十二卷.....	271
第五十三卷.....	292
第五十四卷.....	313

第三十二卷

祈谷乐章。肃和

褚亮

履艮斯绳，居中体正。龙运垂祉，昭符启圣。

式事严禋，聿怀嘉庆。惟帝永锡，时皇休命。

祈谷乐章。雍和

褚亮

殷荐乘春，太坛临曙。八簋盈和，六瑚登御。

嘉稷匪歆，德馨斯饫。祝嘏无易，灵心有豫。

祈谷乐章。舒和

褚亮

玉帛牺牲申敬享，金丝戚羽盛音容。

庶俾亿龄禋景福，长欣万宇洽时邕。



明堂乐章。肃和

褚亮

象天御宇，乘时布政。严配申虔，宗禋展敬。
樽壘盈列，树羽交映。玉帛通诚，祚隆皇圣。

明堂乐章。雍和

褚亮

八牖晨披，五精朝奠。雾凝璇筐，风清金悬。
神涤备全，明粢丰衍。载絜彝俎，陈诚以荐。

明堂乐章。舒和

褚亮

御宸合宫承宝历，席图重馆奉明灵。
偃武修文九围泰，沉烽静柝八荒宁。

雩祀乐章。肃和

褚亮

朱鸟开辰，苍龙启映。大帝昭飨，群生展敬。
礼备怀柔，功宣舞咏。旬液应序，年祥叶庆。



雩祀乐章。雍和

褚亮

绀筵分彩，宝图吐绚。凤管晨凝，云歌晓啭。
肃事蘋藻，虔申桂奠。百谷斯登，万箱攸荐。

雩祀乐章。舒和

褚亮

凤曲登歌调令序，龙雩集舞泛祥风。
彩旄云回昭睿德，朱干电发表神功。

享先农乐章。诚和

褚亮

粒食伊始，农之所先。古今攸赖，是曰人天。
耕斯帝籍，播厥公田。式崇明祀，神其福焉。

享先农乐章。肃和

褚亮

樽彝既列，瑚簋方荐。歌工载登，币礼斯奠。
肃肃享祀，颙颙纓弁。神之听之，福流寰县。



享先农乐章。雍和

褚亮

前夕视牲，质明奉俎。沐芳整弁，其仪式序。

盛礼毕陈，嘉乐备举。歆我懿德，非馨稷黍。

享先农乐章。舒和

褚亮

羽籥低昂文缀已，干戚蹈厉武行初。

望岁祈农神所听，延祥介福岂云虚。

祭神州乐章。肃和

褚亮

大矣坤仪，至哉神县。包含日域，牢笼月窟。

露絜三清，风调六变。皇祇届止，式歆恭荐。

祭神州乐章。雍和

褚亮

泰圻严享，阴郊展敬。礼以导神，乐以和性。

黝牲在列，黄琮俯映。九土既平，万邦贻庆。



祭神州乐章。舒和

褚亮

坤道降祥和庶品，灵心载德厚群生。

水土既调三极泰，文武毕备九区平。

祭方丘乐章。顺和

褚亮

万物资以化，交泰属升平。易从业惟简，得一道斯宁。

具仪光玉帛，送舞变咸英。黍稷良非贵，明德信惟馨。

祭方丘乐章。肃和

褚亮

至矣坤德，皇哉地祇。开元统纽，合大承规。

九宫肃列，六典相仪。永言配命，长保无亏。

祭方丘乐章。雍和

褚亮

柔而能方，直而能敬。厚载以德，大亨以正。

有涤斯牲，有馨斯盛。介兹景福，祚我休庆。



祭方丘乐章。舒和

褚亮

玉帛牲牷分荐享，羽旄干戚递成容。
一德惟宁两仪泰，三材保合四时邕。

祭方丘乐章。顺和

褚亮

阴祗协赞，厚载方贞。牲币具举，箫管备成。
其礼惟肃，其德惟明。神之听矣，式鉴虔诚。

临高台

褚亮

高台暂俯临，飞翼耸轻音。浮光随日度，漾影逐波深。
回瞰周平野，开怀畅远襟。独此三休上，还伤千岁心。

赋得蜀都

褚亮

列宿光参井，分芒跨梁岷。沉犀对江浦，驷马入城闐。



英图多霸迹，历选有名臣。连骑簪纓满，含章词赋新。
得上仙槎路，无待访严遵。

奉和咏日午

褚亮

曦车日亭午，浮箭未移晖。日光无落照，树影正中围。
草萎看稍靡，叶燥望疑希。昼寝惭经笥，暂解入朝衣。

奉和望月应魏王教

褚亮

层轩登皎月，流照满中天。色共梁珠远，光随赵璧圆。
落影临秋扇，虚轮入夜弦。所欣东馆里，预奉西园篇。

咏花烛（烛花）

褚亮

兰径香风满，梅梁暖日斜。言是东方骑，来寻南陌车。
靑星临夜烛，眉月隐轻纱。莫言春稍晚，自有镇开花。



在陇头哭潘学士

褚亮

陇底嗟长别，流襟一恸君。何言幽咽所，更作死生分。
转蓬飞不息，悲松断更闻。谁能驻征马，回首望孤坟。

奉和禁苑饯别应令

褚亮

大藩初锡瑞，出牧迓皇京。暂以绿车重，言承朱传荣。
舒桃临远骑，垂柳映京营。惠化宣千里，威风动百城。
禁籞芳嘉节，神襟饯送情。金笳催别景，玉琯切离声。
野花开更落，山鸟哢还惊。微臣夙多幸，薄宦奉储明。
钓台惭作赋，伊水滥闻笙。怀德良知久，酬恩识命轻。

和御史韦大夫喜霁之作

褚亮

晴天度旅雁，斜影照残虹。野净馀烟尽，山明远色同。
沙平寒水落，叶脆晚枝空。白简光朝幟，彤驺出禁中。
息驾游兰坂，雕文折桂丛。无因轻羽扇，徒自仰仁风。



晚別樂記室彥

褚亮

窮途屬歲晚，臨水忽分悲。抱影同為客，傷情共此時。
霧色侵虛牖，霜氛冷薄幔。舉袂慘將別，停懷悵不怡。
風嚴征雁遠，雪暗去篷遲。他鄉有岐路，游子欲何之。

傷始平李少府正己

褚亮

勞息本相循，悲歡理自均。誰能免玄夜，惜爾正青春。
邁德惟家寶，生才諒國珍。高文綴翡翠，茂學掩麒麟。
述作紛無已，言談妙入神。斷腸雖累月，分手未盈旬。
輔嗣俄長往，顏生即短辰。聲華滿昭代，形影委窮塵。
禪草回中使，生刍引吊賓。同游秘府日，方駕直城闌。
并拜黃圖右，分曹清渭濱。風期嵇呂好，存歿范張親。
虛座憐王述，遺篇慟景純。精靈與毫翰，千祀壽何人。

秋雁（一作虞世南詩）

褚亮

日暮霜風急，羽翮轉難任。為有傳書意，翩翩入上林。



句（贈杜侍御）

褚亮

神羊既不觸，夕鳥欲依人。



第三十三卷

冬日宴群公于宅各赋一字得杯

于志宁

陋巷朱轩拥，衡门缙骑来。俱裁七步咏，同倾三雅杯。
色动迎春柳，花发犯寒梅。宾筵未半醉，骊歌不用催。

冬日宴于庶子宅各赋一字得趣

令狐德棻

高门聊命赏，群英于此遇。放旷山水情，留连文酒趣。
夕烟起林兰，霜枝殒庭树。落景虽已倾，归轩幸能驻。

冬日宴于庶子宅各赋一字得色

封行高

夫君敬爱重，欢言情不极。雅引发清音，丽藻穷雕饰。
水结曲池冰，日暖平亭色。引满既杯倾，终之以弁侧。



冬日宴于庶子宅各赋一字得节

杜正伦

李门余妄进，徐榻君恒设。清论畅玄言，雅琴飞白雪。
寒云暖落景，朔风凄暮节。方欣投辖情，且驻当归别。

玄武门侍宴（一作侍宴北门）

杜正伦

大君端宸暇，睿赏狎林泉。开轩临禁籞，藉野列芳筵。
参差歌管飏，容裔羽旗悬。玉池流若醴，云阁聚非烟。
湛露晞尧日，熏风入舜弦。大德侔玄造，微物荷陶甄。
谬陪瑶水宴，仍厕柏梁篇。阍名徒上月，邹辩讵谈天。
既喜光华旦，还伤迟暮年。犹冀升中日，簪裾奉肃然。

奉和正日临朝

岑文本

时雍表昌运，日正叶灵符。德兼三代礼，功包四海图。
逾沙纷在列，执玉俨相趋。清跸喧辇道，张乐骇天衢。
拂蜺九旗映，仪凤八音殊。佳气浮仙掌，熏风绕帝梧。
天文光七政，皇恩被九区。方陪瘞玉礼，珥笔岱山隅。



奉述飞白书势

岑文本

六文开玉篆，八体曜银书。飞毫列锦绣，拂素起龙鱼。
凤举崩云绝，鸾惊游雾疏。别有临池草，恩沾垂露馀。

冬日宴于庶子宅各赋一字得平

岑文本

金兰笃惠好，尊酒畅生平。既欣投辖赏，暂缓望乡情。
爱景含霜晦，落照带风轻。于兹欢宴洽，宠辱讵相惊。

安德山池宴集

岑文本

甲第多清赏，芳辰命羽卮。书帷通行径，琴台枕槿篱。
池疑夜壑徙，山似郁洲移。雕楹网萝薜，激濑合埭篱。
鸟戏翻新叶，鱼跃动清漪。自得淹留趣，宁劳攀桂枝。

安德山池宴集

刘洎

平阳擅歌舞，金谷盛招携。何如兼往烈，会赏叶幽栖。



已均朝野致，还欣物我齐。春晚花方落，兰深径渐迷。
蒲新节尚短，荷小盖犹低。无劳拂长袖，直待夜乌啼。

安德山池宴集

褚遂良

伏枥丹霞外，遮园焕景舒。行云泛层阜，蔽月下清渠。
亭中奏赵瑟，席上舞燕裾。花落春莺晚，风光夏叶初。
良朋比兰蕙，雕藻迈琼琚。独有狂歌客，来承欢宴馀。

安德山池宴集

杨续

狭斜通风阙，上路抵青楼。簪绂启宾馆，轩盖临御沟。
西城多妙舞，主第出名讴。列峰疑宿雾，疏壑拟藏舟。
花蝶辞风影，蘋藻含春流。酒阑高宴毕，自反山之幽。

游清都观寻沈道士得仙字

刘孝孙

纷吾因暇豫，行乐极留连。寻真谒紫府，披雾覩青天。
缅怀金阙外，遐想玉京前。飞轩俯松柏，抗殿接云烟。



滔滔清夏景，嘒嘒早秋蝉。横琴对危石，酌醴临寒泉。
聊祛尘俗累，宁希龟鹤年。无劳生羽翼，自可狎神仙。

早发成皋望河

刘孝孙

清晨发岩邑，车马走轘辕。回瞰黄河上，恹恹屡飞魂。
鸿流遵积石，惊浪下龙门。仙槎不辨处，沉璧想犹存。
远近洲渚出，飒沓凫雁喧。怀古空延伫，叹逝将何言。

游灵山寺

刘孝孙

吾王游胜地，骖驾历祗园。临风画角愤，耀日采旗翻。
永怀筌了义，寂念启玄门。深溪穷地脉，高嶂接云根。
信美谐心赏，幽邃且攀援。曳裾欣扈从，方悟屏尘喧。

冬日宴于庶子宅各赋一字得鲜

刘孝孙

解襟游胜地，披云促宴筵。清文振笔妙，高论写言泉。
冻柳含风落，寒梅照日鲜。骊歌虽欲奏，归驾且留连。

